

Evening Dogri News Bulletin, 15 April. 2026

इवनिंग डोगरी न्यूज़ बुलेटिन
समे .18:15 Hrs

Headlines

1. लेफ्टिनेंट गवर्नर मनोज सिन्हा होरें नशामुक्त जम्मू-कश्मीर अभियान दे तैहत रामबन च पद्यात्रा दी अगुवाई कीती ते आखेआ जे जिसले समाज इकजुट होंदा ऐ तां कनून मता मजबूत होई जंदा ऐ।
2. मुखमंत्री उमर अब्दुल्ला होरें कश्मीर हाट च Know your Artisan कार्यक्रम दा उद्घाटन कीता ते आखेआ जे सरकार दस्तकारी खेत्तर कनै जुडे दे कारीगरें लेई कम्म-रोजगार दे मौके पैदा करने गितै बचनबद्ध ऐ।
3. श्री अमरनाथ जात्तरा लेई अगेत्रे पंजीकरण दी प्रक्रिया जम्मू च शुरू, खरी मती गिनतरी च श्रद्धालु पंजीकरण लेई पुज्जा करदे ना।
4. मुख सचिव अटल डुल्लू होरें जम्मू-कश्मीर दे बक्ख-बक्ख जिलें च केंद्री विद्यालयें ते जवाहर नवोदय विद्यालयें दी स्थापना लेई जारी प्रक्रिया दी समीक्षा कीती।
5. मौसम विभाग नै कल्लै धोड़ी जम्मू-कश्मीर च मौसम खुशक रौहने ते 17 अप्रैल थमां बरखा बरने दी भविक्खवाणी कीती ऐ।

<><><><><><>

LG-Ramban

उपराज्यपाल मनोज सिन्हा होरें अज्ज नशामुक्त जम्मू-कश्मीर अभियान तैहत रामबन च इक विशाल पैहली यात्रा गी झंडी दस्सियै रवाना कीता। एहू आयोजन नशाखोरी खलाफ चलाए जा'रदे 100 दिनें दे इक व्यापक अभियान दा हिस्सा ऐ। इस मौके अपने संबोधनै च उपराज्यपाल होरें आखेआ जे एहू अभियान इक पक्का निश्च ऐ, जम्मू-कश्मीर दे नौजवानें गी हर सनैहरी भविक्ख देने लेई उनेंगी नशाखोरी कोला दूर रखने लेई जागरूक बनाने दा। उनें आखेआ कि जिसले समाज दे नेक कम्मै लेई इकजुट होइयै कम्म करदा ऐ तां जे उसलै कनून बी मते मजबूत होंदे न ते मते असरदार ढंगै'नै उंदी अमलावरी यकीनी बनदी ऐ। एल.जी होरें आखेआ कि असें सबनें गी मिलियै समाज च इक ऐसा म्हौल तैयार करना लोडचदा कि नशे दा कारोबार करने आह्लें पर दबाऽ ते डर बने दा रवै। उनें आखेआ

<><><><><><>

CM-Kashmir Haat

मुखमंत्री उमर अब्दुल्ला होरें अज्ज कश्मीर हाट श्रीनगर च नो यॉर आर्टिसन-सौलफुल कश्मीर नमैश दा उद्घाटन कीता। इस मौके बोलदे होई मुखमंत्री होरें घाडी दे समृद्ध सगोसार दस्तकारी विरसे दे संरक्षण ते इसी बढ़ावा देने दे सरकार दे धेइए गी फही पक्का कीता ते आखेआ जे सरकार दस्तकारें गी अपनी कला दा प्रदर्शन करने ते उंदे आसेआ तैयार उत्पादें दी बड्डे बजारें तगर पुज्ज यकीनी बनाने लेई सुद्धे जतन करै करदी ऐ। इस मौके पर मकामी कारीगिरें आसेआ तैयार दस्तकारी दे शानदार नमूने दिक्खने लेई रक्खे गेदे हे। इस मौके बोलदे होई मुखमंत्री होरें आखेआ

<><><><><><>

Amarnath

अमरनाथें दी सलाना जात्तरा लेई नां लखाने दा सिलसिला अज्ज थमां शुरू होई गेआ ऐ ते अज्ज पैहले रोज गै देसै दे बक्ख-बक्ख हिस्सें च नामजद बैंकें च खरा-मता रश दिक्खने गी लब्बा। नां दर्ज कराने लेई लोक बैंकें च पुज्जा करदे न-पर कन्नै गै घर बेइयै आनलाइन बी यात्रा लेई नां लखाने दी सुविधा उपलब्ध ऐ। 57एं दिनें धोड़ी चलने आहली एहू जात्तरा 3 जुलाई गी शुरू होगे ते 28 अगस्त रक्खन पुन्नेया आहले रोज सम्पन्न होई जाहगा। पंजाब नेशनल बैंक गी यात्रा पंजीकरण लेई नोडल एजेंसी बनाया

गेदा ऐ ते मुख्य भरै च 556 शाखाएं च पंजीकरण कराने दा कम्म शुरू होई गेदा ऐ। जम्मू च बैंकें च अपना रजिस्ट्रेशन कराने लेई आए दे श्रद्धालुएं च मता उत्साह दिक्खने गी लब्बा जिंदे चा किश नै आकाशवाणी कन्नै गल्ल करदे होई आखेआ

<><><><><><>

BCCI-Prez. LG

भारती क्रिकेट कंट्रोल बोर्ड-बी.सी.सी.आई दे प्रधान मिथुन मन्हास होरें अज्ज जम्मू च लेफ्टिनेंट गवर्नर मनोज सिन्हा हुं'दे'नै मलाटी कीती। मन्नेआ जा'रदा ऐ जे बैठक दरान जम्मू-कश्मीर च क्रिकेट दे विकास ते इसी बढजवा देने कन्नै जुडे दे मामलें पर चर्चा कीती गई ऐ। एह्दे अलावा इब्बी दस्सेआ जा'रदा ऐ जे इस बैठक दे दरान खेड्डु ढांचे गी तगड़ा बनाने सने युवा ते नमें उभरा करदे क्रिकेट खड्डारिएं लेई मौकें दे विस्तार करने बारै बी गल्लबात कीती गई ऐ।

<><><><><><>

Haj-Flights

जम्मू-कश्मीर दी हज कमेटी नै ऐलान कीता ऐ जे इस ब'रे दी हज जात्तरा लेई श्रीनगर थमां डोआरियां औंदी 18 अप्रैल थमां शुरू होडन। आकाशवाणी दे जम्मू संवाददाता दी रिपोर्ट मूजब पैहली त्रै डोआरियां उस्सै ध्याडे लेई तय न। श्रद्धालुएं गी आखेआ गेआ ऐ जे ओहू उनेंगी दित्ते गेदे समें दे मताबक गै श्रीनगर दे बेमीना आले हज हाउस च रिपोर्ट करन। कमेटी नै सबनें श्रद्धालुएं गी गुजारश कीती ऐ जे ओहू ब्हाई अड्डे पर अपनी रवानगी आली प्रक्रिया गी बवस्थित बनाने लेई रिपोर्टिंग दे समें ते अपने समेयान मतल्लक दिशा-निर्देशें दी पालमा जकीनी बनान। ध्यानजोग ऐ जे जम्मू-कश्मीर थमां इस ब'रे कुल 4 ज्हार 704 श्रद्धालु हज जात्तरा लेई जा करदे न।

<><><><><><>

CS-KVs

मुख सचिव अटल डुल्लू होरें जम्मू-कश्मीर च केंद्री विद्यालयें ते ज्वाहर नवोदय विद्यालयें लेई जिमीं ते ढांचागत सुविधाएं दा जायजा लैने आस्तै अज्ज इक बैठक दी प्रधानता कीती। बैठक दरान ओकडे स्कूलें दी स्थिति दा आंकलन कीता गेआ जेह्दे आरजी तौरा पर होरनें ईमारतें थमां कम्म करा'रदे न ते उं'दे लेई स्थाई कैंपस बनाने लेई जिमीं दी शिनाख्त बी कीती जा'रदी ऐ। मुख सचिव होरें सरबंधत अधिकारिएं गी निर्देश दित्ते जे ओहू जिमीं मुंतकिल करने दी प्रक्रिया च तेजी आहनन ते बकाया रौहंदे संस्थानें दी स्थापना आले कम्में गी बी तेजी कन्नै तोड चाढन। अधिकारिएं उनेंगी जानकारी दित्ती जे मते सारे ज्वाहर नवोदय विद्यालय चालू होई गेदे न जिसले के केई सारे केंद्री विद्यालयें दा कम्म सबूरा होने दे कोल कश पुज्जी गेदा ऐ। मुख सचिव होरें इ'नें स्कूलें गी तौले चालू कीते जाने दी जरूरतै पर जोर पाया तां जे प्रदेश च बच्चें लेई म्यारी शिक्षा यकीनी बनाई जाई सके।

<><><><><><>

Reasi Tourist Flow

जिला प्रशासन रियासी आसेआ श्री शिवखोडी तीर्थस्थान पर हर रोज 24 घैंटें श्रद्धालुएं दी आमद दी इजाजत आले लैते गेदे फैसले कन्नै श्रद्धालुएं दी आमद ते मकामी आर्थिक गतिविधिएं पर बडा सकारात्मक असर दिक्खने गी लब्बा करदा ऐ। स्हाडे जिला संवाददाता दी रिपोर्ट मूजब श्रद्धालु ते सैलानी बदाई गेदी अवधि दा इस्तेमाल तीर्थ स्थान आले इलाके च घुम्मने ते बक्ख-बक्ख तत्थें बारै जानने ते कन्नै लगदे इलाकें च रोमांच ते मनोरंजन आली गतिविधिएं लेई करा करदे न। इस सरबंधै च आकाशवाणी समाचार कन्नै गल्ल करदे होई किश सैलानिएं आखेआबाईट.....

तोआई, मकामी हितधारकें इस गैहू दा सुआगत करदे होई आखेआ ऐ जे एह्दे'नै सैलानिएं दी आमद च बडा बाद्दा होआ ऐ। सैलसफा खेत्तर कन्नै जुडे दे कारोबार जि'आं ट्रांसपोर्ट, होटल ते खाने-पीने दे कम्में च बी बल्लें-बल्लें तेजी दिक्खने गी लब्बा'रदी ऐ। इस मकामी कारोबारी नै इस बारै आखेआ ऐबाईट.....

<><><><><><>

Kishtwar

जम्मू युनिवर्सिटी दे किश्तवाड कैंपस नै किश्तवाड दे जिला कनूनी सेवा प्राधिकरण दे सहयोग कन्नै रैगिंग रोधी कनूनें ते शकैतें सरबन्धी प्रणालिं दे बारे च इक ध्याडे दे जागरूकता कार्जक्रम दा सरिस्ता कीता। केई सारे संस्थानें थमां आए दे विद्यार्थिं इस कार्यक्रम च हिस्सा लैता। इस मौके पर माहिरें-विशेषज्ञें रैगिंग दी कनूनी परिभाशा, एह्दे इतिहास ते शिक्षा संस्थानें च मजूदा चुनौतिं बारै अपने बचार सांझे कीते। एह्दे अलावा विद्यार्थिं दी सुरक्षा लेई उपलब्ध सरिस्ते पर बी लोऽ पाई। कार्यक्रम दे अखिरै च विद्यार्थिं एह सगंध चुक्की जे ओह् अपने कैंपस गी रैगिंग थमां मुक्त रक्खडन ते नेही कुसै बी घटना दी रिपोर्ट लेई कनून जरिये दा इस्तेमाल करडन। इस बारै होर ब्यौरे सांझे करदे होई इक माहिर नै आखेआ

<><><><><><>

Weather

मौसम विभाग दा आखेना ऐ जे जम्मू-कश्मीर च अज्ज ते कल मौसम आमतौर पर खुशक बने दा रौहग। ऊआं कल संजा'लै किश थाहरें पर हौली बरखा ते गरज-चमक दी मेद बी दस्सी गई ऐ। एह्दे परैन्त 17 ते 18 अप्रैल गी केई थाहरें पर हौली बरखा ते गरज-चमक कन्नै बरखा बरने- अंधी-झक्खड झुलने ते किश थाहरें पर ऐन पौने दी बी भविक्खवाणी कीती गई ऐ। इस बारै मौसम विभाग दे निदेशक मुख्तार अहमद होरें दस्सेआ

<><><><><><>